



Tir Yimyim


www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 7

Yangia anidakangma :



tir yimyim

TAPAK 3



Bangladesh-i tesunep nung rangloktsüla: Wickremesinghe

Atishi-i September 21 nü Delhi Chief Minister tenangzükba agitsü



VOL. XXI ISSUE NO. 338 (ADOK 338) DIMAPUR ROGONÜ (FRIDAY) RONGJUI (SEPTEMBER) 20, 2024 ₹ 5.00

Oting lendongkeno atema NSF-i Home Minister dangizülü

Dimapur, Rongjui/Sept. 19 (TYO): Mon district kübok Oting nung December 4, 2021 nü civilian 14 tepsetba nung dena alir 21 Para (SF) züngsem anema benoka aliba ken o shibangtsüba asoshi kanga jashir aser süoki ia bilemer, ta Naga Students' Federation (NSF) ajanga Home Minister, Government of India dangi tezüluba ka September 19, 2024 nü agüja liasü.

Supreme Court ajanga temerenshi magütsüi FIRs tem shibangtsü September 17, 2024 nü telemtetba agiba ajanga Naga nüburi mapang talangka nungi meshidak nung timtem balala ajangshia aruba tali tamajungba kumdaktsür.

Aibelena aliba sepai nem Government of India-i tanen makai prosecution sanction agütsütsü memulungba ajanga NSF kanga süngmanger. Nagaland sorkari kumtetba Special Investigation Team (SIT) ajanga kuli tejangja nung ajemdaker 21 Para (SF) züngsem 30 anema chargesheet benok. Item ken o tapi agi benokba masü, saka kanga junga bushisüngdangba sülen ngutetba kuli agi yarisma lir. Ajisüaka ken o jembitsü memelaba yagi tasüngdangba balala arur: Government of India ya kechi miimbangtsü meranger? Mapa tamajung inyakaka kechiba ochi obendang soita ayur? Ken o jembitsü memelaba ajanga sorkari temzüng-ozüing wazüka ayutsü melena aibelener kumzüka ayur

amai ajiteter, ta NSF-i Home Commissioner, Government of Nagaland ajanga Union Home Minister dangi züluba shiti nung shia lir.

Iba tetsübotsü lendong nung ochi obendang agütsütsü Naga nungeri amajok nung mapang talangka ataogo. SIT ajanga kuli tejangja nguteta liaka Supreme Court-i July 2022 nung iba ken o mejembi soita atatsü obendang agütsü aser tatem nung ken o shibangtsüba yagi Naga nungeri temzüng-ozüing aser democratic institutions nung tamang akaba samadaktsür.

Oting lendong ama taoba mapang Armed Forces Special Powers Act (AFSPA), 1958 kübok tim masüba timtem aser reshikangshia jenti Naga nungeri ajangshia arur.

Mapang talangka nungi Northeast nung aliba nüburtemi anema nokdakaka AFSPA yagi armed forces personnel temi aibelenaka temerenshi magütsüi kumzüka ayur aser tapi agi nisung tepseta meimchir temeden nung aibelena inyaksangshitsü melar.

Democratic society ka nung iba ozüing ya menüngdak. Government of India-i Naga nunger aliba tesem nungi AFSPA agientsü mapang tongogo. Tai maket nüburtem anema aibelen mapa inyakertemi jong ama AFSPA amshibahi Oting lendong ya tatishitsü tejangja lir, ta NSF ajanga ashi.

(Maneni tapak 2 nung...)

Naga nungeri ochi asoshi teti nokdaktsü: NSCN/GPRN

Dimapur, Rongjui/Sept. 19 (TYO): Mon district kübok Oting yimtsüng nung December 4, 2021 nü 21 para special force army unit ajanga tai maket Naga nunger civilian 14 tepsetba bilemettsüsa akumer, ta NSCN/GPRN sangdong ka ajanga ashi.

Occupation force tem Nagalim nung tetsüing ajemokba anogo nungi asen tsükchir temi Naga nunger samatsütsü tasa tanü tashi kasa lir.

Aser India linüki AFSPA kübok tanen makai Naga nunger ya separatist, linük nungi pilaner, telungpur ta züngshir aser Nagalim tesem ajanga nung temenen mapa tamajung ajak inyaker, ta NSCN/GPRN sangdong ajanga ashi.

August 1, 1997 nungi ceasefire liaka Oting, Nagalim nung December 4, 2021 nü Army personnel temi telungpur südi ta aibelena tai maket Naga nunger nisung trok taochi makai khaset aser ano tai maket Naga nunger longkak aiter nisung ti tepsetba ya temenüntsü, yazü-yapong aser Naga nunger ya nisung meimchir ama mezüngshiba

inyakyim lir. Naga nunger ya ochi meimba nisungtem. Anungji iba ama mapa tamajung inyaker memerenshi yutsüba ya onok shisatsü agi matonger. Iba ama mapa tamajung inyakba aser reshikangshiba anema Naga nunger teti nokdaktsü aser raratsü.

Oting lendong nung shilem agir Indian army personnel 30 anema ken o benoka aliba Indian Supreme Court-i September 17, 2024 nü agientsüba ya Naga nunger asoshi taoksatsü osang ka lir. Timtem ajurur alir nem ochi obendang magütsüba tema tashii tai apur, ta NSCN/GPRN ajanga ashi.

Danga tatalokba aika rongnung Oting lendong ya meimchir temeden nung aibelenba tejangja ka lir. Timtem ajurur alir den NSCN/GPRN nokdaka lir aser ochi obendang agütsütsüla. Ochi obendang magütsü tashi Indian Army yimya ya nisung meimchir temeden züngshia aser ochi obendang meimba nübur katia mamadoktsü, ta NSCN/GPRN sangdong ajangasa ashi.

Department-i mapang shidak nung proposals agütsütsüla: T.R. Zeliang



HODs aser HODs tem den senden ka amendang Deputy Chief Minister aser minister-in-charge of Planning & Transformation Department, T.R. Zeliang-i jembiba noksa nung angur. (Kohima Sept. 19, 2024)

Dimapur, Rongjui/Sept. 19 (TYO): Secretariat Conference Hall, Kohima nung September 19, 2024 nü AHODs aser HODs ajanga den terenlok mapa inyakba asadanga senden ka amenba nung jembidang Deputy Chief Minister aser minister-in-charge of Planning & Transformation Department, T.R. Zeliang-i department ajanga dang Planning & Transformation Department ajanga agütsüba Calendar of Action for Developmental Activities 2024-25 sülen shidak anidaktsü totuyuba agütsü.

Financial institution balala nungi loan agitsü jembia aliba densema State Plan teyari nung terenlok mapa inyaktsü atema proposals tem magütsüi aliba department ajanga dang tekeratiba nung agütsütsü pai ashi.

"Subject to approval of" mesüra "Ex-post facto approval" nung ajemdaker Planning

Clearance agütsüba yimya joko mamshitsü, ta pai ashi.

Zeliang-isa mapang shidak nung taruba Financial year nung inyaktsü atema departmental programmes tem mapang shidak nung agütsütsü tongtipang ta ashi, kechiaser yamaji inyakba ajanga proposals reprangshima Sectoral Outlay atema Planning Department mapang peria alitsü ta ashi.

Agri. & Allied Sector kübok programmes aser scheme tem atema Deputy Chief Minister-i mapa kuma inyakba department dang pei sentong asoshi sanction atema December-January ita inyakteptsü ashi, kechiaser mapa tem April ita nungi tenzüka inyaktsü aser ibaji Agri. & Allied dak sendakba mapa inyaktsü mapang shidak lir ta ashi.

Ki o jen aser danga terenlok mapa atema sanctions ya June-July nung agütsütsüla, kechiaser tendering aser danga maparen ya August-September nung

rener October-November nungi mapa inyak tenzütsüla, ta pai ashi.

Department balalai nüngdakba osang mapang shidak nung magütsüba lir, aser maneni nenshiaka submission kar kanga agi menur arur, ta Zeliang-i ashi aser osangtsüsang asüngdangyaba mashi mapang langzütsü atema department ajanga dang Data Management System shidak renema alitsü ayongzük.

State nung terenlok mapa inyakba yimya tajungba kuma melenshitsü nüngdaker, anungji State sorkar indang Department ajungai amalitep akatsüla aser shilem tajung agitsüla, ta Deputy Chief Minister Zeliang-i ayongzük.

Iba senden ya Commissioner & Secretary, Kitto Zhimomi lenisüba kübok agi aser Administrative Heads of Departments aser Head of Departments tem dena liasü.

Oting lendong atema SC obendang magizükteter: Naga Hoho

Dimapur, Rongjui/Sept. 19 (TYO): Oting nung December 4, 2021 nü nisung tepsetba nung adener Indian Army personnel 30 anema Supreme Court ajanga September 17, 2024 nü obendang agüja iba ken o tembangba asoshi temulung masüba lemsateper aser khukhua aitsür, ta Naga Hoho ajanga sangdong ka nung ashi.

Centre (Central Government) ajanga temelaba agütsüra 'logical conclusion' kati arutsü ta Supreme Court-i obendang agütsüba ya tema tazütsü dang lir, aser sorkar indang khu abentsü mokoki executive branch nem nungloktsüba lir.

Iba lendong nung tai maket civilian 14 takum sama aser iba lendong ya ajanga Armed Forces Special Powers Act (AFSPA) 1958 ta ajaba ozüing tamajung kübok Naga nüburi timtem balala ajuruba sayur. Iba Act yagi Indian Armed Forces tem aibelenba asoshi temerenshi kecha tsüboa melie inyaksangshir aser paroki kumzüka ayutsü nangzükba anema kuli tejangja makai rarar aser civilian court

temi memerenshitsüsa tashi agütsür, ta Naga Hoho-i ashi.

Oting lendong ya kodanga matalokdangba lendong ka atalokba masü. Ibai Naga nungeri Civil aser Political Rights asoshi mapang talangka nungi timtema arudang Indian Army-i tashiyim amshia ajemreptsü merangba tesüsa atalokba ka dang lir. 1960 küm Matikhru nung nisung tepsetba. 1987 küm Oinam nung shiruru mapa inyakba, Mokochung-Akuluto nung 1994-95 küm tashiyim amshia shi nung medemba aser ki o jen rongdoktsüba, 1995 küm Kohima nung azüdokshiba, Wuzu nung 2015 küm kaketshir tepsetba amala densema lir. Linük nung temzüng-ozüing wazüka ayur, Supreme Court-i maneni Armed Forces tem nem par mapa yari ochi obendang magütsüi maneni kumzüka yirua, iba ama mapa tamajung inyakba aser civilian tem asüba ya timba ang akumtsü, ta ashi.

Nagaland Police indang Special Investigation Team ajanga benoka aliba ken o agientsü

Supreme Court-i telemtetba agiba ajanga iba timtem ajurur alir aser kinunger tem temeden kodanga mangutsü ta sayur. Ibai parnoki ochi obendang bushiba nung teimla samaja obendang agütsüba ama angateter, ta Naga Hoho-i ashi.

Oting lendong ya meimchir temeden anema aibelenba tejangja lir aser iba ken o magizükba ajanga obendangba nung tamang makai akumer aser nüburtemi rule of law nung temulung melemei kumdaktsür. Anungji Government of Nagaland dang Naga nunger aser talisa timtem ajurur aliba kinung nem ochi obendang bushiba maparen tezü danga metoktsüi lenmang tem bushia ajak nem ochi obendang agütsüdaktsütsü Naga Hoho-i ayongzük.

Iba ochimashi obendang anema Naga Civil Society Organizations, Tribal bodies, Human Rights asoshi nokdaker, Naga political groups aser Naga nunger senso ajanga nokdaktsü ayongzük, ta Naga Hoho sangdong ajangasa ashi.

MAA dak sendakba nung district level training Mkg nung agidar



DPO (UIP & RCH) aser shisalen sayur den training nung shilem agirtem tangokba noksa nung angur.

Dimapur, Rongjui/September 19 (TYO): CHO, Staff Nurse aser ANM tem atema Mother's Absolute Affection (MAA) dak sendakba nung anogo ana atema District Level Training September 19 nü CMO Conference Hall Mokokchung nung tenzüokogo.

Lokti pela agizükba o jembiba mapang DPO (RCH & UIP) Dr. Limanaro-i, sentong nung shilem agirtem dang kanga nendaka shilem agia takok tashi tesayubatem angazüksü, aser tangazükbatem lemsatepba den benoka inyaksangshiyonga

aotsü ayongzüka liasü. Training nung shisalen sayur paediatrician IMDH Dr. Imlisenba Lemtur-i, o jembiba mapang tetsü ka ya tanur ka asoshi anepalur tajungtiba lir ta ashi. Power Point presentation ka ajanga pai optimal Infant aser Young Child feeding practices aser mama yongdaksüba dak sendakba nung tangazükba agüja liasü.

Dr. Imlisenba-isa, mama yongdaksüba ya koda tongtibang iba indang lemsatepba den iba ya tetsü aser tanur naprongla atema

koda tajangzüik lir iba indang metetdaksü. Paisa, mama yongdaksütsü memulungba ajanga kechi ataloker iba indang, tanur ka mesüba yimya aser HIV, shiranga aliba mapang aser recovery mapang chiyongtsü agütsüba, mama yongdakja aliba tetsütem atema Nutrition aser parnok indang health aser fertility dak sendakba nung tangazükba agüja liasü.

Maneni training nung shilem agirtem practical session ka IMDH Mokokchung nung agia liasü.

NIELIT Kohima Mega Job Fair tenzüokogo



Ketdangser aser mapa bushirtem külemi tangokba noksa angur.

Dimapur, Rongjui/September 19 (TYO): National Institute of Electronics and Information Technology (NIELIT), Kohima-i ayongzüka anogo ana atema Nagaland kübok centre balala nung September 19 nü nungi Mega Job Fair 2024 tenzüokogo. Job Fair ya Kohima, Dimapur aser Chuchuyimlang nung agidaki.

Iba sentong ya mapa bushirtem aser employers tem tsüingda apu latsütsü nükjidong nung ayongzüokogo, aser sentong yagi industries balala aser mapa bushia aliba lanurtem aika atsüa aruogo.

Mega Job Fair lapokba sentong nung NIELIT Kohima Director, L. Lanuwabang-i okila jembiba liasü. O jembiba mapang pai, kanga kara meleshia aoba job market aser talisa automation aser artificial intelligence (AI) agi industry tem maneni melenshija aoba mapang ka nung reskilling aser upskilling koda tongtibang iba indang lemsatepba.

Pai mapa bushirtem aser lanur professional tem dang kümküma alitsü aser tarutsü

atema renema alitsü ajungshiba den mapa tasen angazüka aotsü nüngdaka lemsatepa liasü. Paisa, business aser industry ajak nung IT aser technology skills nüngdakba lemsatepa liasü.

Nagaland nung sorkar mapa dang aginüba indang jembiba mapang pai, sentong nung shilem agirtem dang mangdang ulushitsü aser sorkar mapa ama dang private-sector nunga maongkatem asadangtsü ajungshia liasü.

"Item shilemtem agiba mapang tangazükbatem ajanga nü career yanglutsütsü aser tarutsü nung tali toktepa aotsü atema na tashi taitba kümduktsütsü," ta pai ashi. Employers tem dang parnoki iba sentong nung shilem agiba atema kanga pelaba lemsatepba den pai candidate tem dang iba maongka ya agitsü ajungshia liasü.

Kasa mapang nung NIELIT Kohima Joint Director, Morimenba Amer-i lokti pela agizükba o jembiba aser Moakumla-i Tsüingrem temaotsü meshizüka

sarasadema liasü.

Iba job fair nung digital marketing, software development, automobiles, logistics, construction, food processing, printing, aser telecommunications amala sector nungi employers 15-i shilem agia liasü. Mapa 1,500 shi agitsü asoshi maongka agütsüogogo aser item mapatem ya Nagaland nung inyaksüba nungi tenzüker India kübok Tier 1 yimitem aser bendanglen aser talisa Europe nung mapa inyaksü asoshi maongka lir. Itasen timtiba agütsüba ji küm nung sen lakh 33.36 tashi agütsütsüba densema liasü.

NIELIT Mega Job Fair 2024 ajanga, employers aser mapa bushirtem atema sabang tajung ka agütsütsü asoshi NIELIT Kohima bendanga agütsür aliba sayur, aser iba ajanga state rongsenketzüng nung renloka aotsü asoshi teyari agütsütsü. Iba sentong ajanga lanur, educated professionals tem aika atsüa aruogo, shirnok parnok career asoshi lenmang mesapoka aotsü asoshi tejangraba tulu lir.

Kohima nung Dobashi meshimi ataba metetdaksü

Dimapur, Rongjui/September 19 (TYO): Kohima Deputy Commissioner, Kumar Ramnikant, IAS-i sangdong ka ajanga, 21/08/2024 nü DC Office Advertisement NO.DCK/ESTT/DLRB/13/2013(PT-3) aser Office of the Commissioner, Nagaland letter

NO.CNE/DLRB-DA/2024/1719 dated 12-09-2024 melenshia District Administration, Kohima kübok Dobashi tenet shimtsü atema District Level Recruitment Board (DLRB) ya osang magütsü tashi sota ataba metetdaksüogogo.

DoTE-i Scholarship indang metetdaksü

Dimapur, Rongjui/September 19 (TYO): Directorate of Technical Education, Nagaland-i sangdong ka ajanga, Nagaland nungi Schedule Tribes kaketshirtem shirnok India kübok All India Council for Technical Education (AICTE) & Council of Architecture-i agizüker aliba Engineering Institutes (fresh & renewal)

tem nung Diploma/ Undergraduate and Postgraduate courses agidar, parnok session 2024-2025 atema scholarship asoshi online ajanga züngoksemtsü metetdaksüogogo. Scholarship atema Common Scholarship Portal. www.Scholarship.nagaland.gov.in ajanga September 20 nungi November 30, 2024 nü tashi nungbo züngoksemtsüla.

Dimapur DP&DB Sept 24 nü amentsü

Dimapur, Rongjui/September 19 (TYO): Dimapur Deputy Commissioner & Vice Chairman, DP&DB Dimapur, Dr. Tinojongshi Chang-i sangdong ka ajanga, September ita atema Dimapur District DP&DB senden

September 24 nü 11:00 ako nungi tenzüka DC Conference Hall, Dimapur nung amentsü ta metetdaksüogogo. DC-isa, iba senden nung züngsem ajak tamakok maludaksüü arua shilem agitsü mepeshia metetdaksüogogo.

Merekmeju ajungkettsü atema Kohima nung sentong agi

Dimapur, Rongjui/September 19 (TYO): Tang tagidak aliba 'Swachhata Hi Seva 2024' campaign kübok merekmeju ajungkettsü nükjidong nung Kohima Municipal Council (KMC) aser Swachhata Bharat Mission na longjemer September 19 nü Old NST, Kohima nung street play ka ayongzüka agiogo.

Saya ya St. Joseph's Autonomous College, Jakhama drama club-i sayua liasü, koba lokti adenshiba tesemtem meraka ayutsü koda tongtibang iba dak sendakba nung nüburtem nem tangazükba agütsütsü nükjidong nung ayongzüka liasü.

KMC Chief Inspector Neilhouphrelie Paphino-i sentong nung o tatsü ka jembiba mapang dokan kiburtem aser senzusenpongertem dang anener iba saya reprangtsü

mepeshia liasü. Paisa, Kohima meraka ayutsü atema ajaki pei shilem agitsü koda tongtibang iba indang lemsatep.

Kasa mapang nung KMC Deputy Chairperson, Khrielievi Chüsi-i lokti dang pei ki dang mereksüba masü saka pei aliba temeketa meraka ayutsü kodang tongtibang iba indang lemsatep. Paisa, yimti meraka ayutsü atema longjemer inyaksü kodang tongtibang iba indanga lemsatep.

Sentong nung kaketshirtemi tetezü tajung aketba saya ka ia sayu. Iba saya ajanga merekmejua alitsü atema lisopur ajaki shilem agitsü koda tongtibang iba indang metetdakja liasü.

Kohima temerekba aser tajungba küma yanglushitsü atema lokti anisemtsü asoshi inyaka aruba nung iba sentong ya-a shilem ka liasü.

Oting lendong ken o atema... (TAPAK 1 NUNGI...)

Civilian tem aibelena jangjatetba ajanga itdangiterba nung metokmeperi tulu aliba sayur, koba ajanga senti takum jenti samaogo. Itdangiterba tsütsü tamakok ajuruba ya kanga junga bushisüngdangtsüla aser aibelener nem tapet temerenshi agütsütsüla, ta ashi.

Anungji Oting lendong nung dena lir ta tai tonglokja aliba 21 Para (SF) anema ken o jembitsü temelaba agütsütsü aser kanga mejungi itdangiter mapa inyakba atema Union Government nungi ochi obendang agütsütsü akhanger,

ta NSF ajanga ashi. Naga homeland aser Northeast nungi tangsa AFSPA agientsüla, aser item takhangba ama meinyakra iba lendong nung timtem ajurur alir aser par kinunger asoshi democratic yimya nung NSF-i mera agitsü. Iba ama tapi agi tim masüba mapa inyakba atema Naga nung ajem-ajema malitsü, ta ashi.

Naga nüburi ochi obendang akhanger aser Government of India dang ochi obendang den nokdaksü ajungshir, ta NSF ajanga Union Home Minister dangi züluba shiti nung shia liasü.

Atishi-i September 21 nü Delhi Chief Minister tenangzükba agitsü



New Delhi, September 19 (Agencies): Delhi Chief Minister menden atema shima alila, Atishi den cabinet tasenbai September 21 nü tenangzükba agitsü, ta Brihostibarnü Aam Aadmi Party (AAP)-i metetdaksü.

Tamalenbo AAP-i Atishi-i dang tenangzükba agitsü ta metetdakja liasü saka Brihostibarnüo party-i, lai aniba Council of ministers-ia tenangzükba agitsü, ta metetdaksü.

Mongolbarnü Arvind Kejriwal-i Delhi chief minister

menden toktsüba sülen CM menden atema Atishi shim. Iba sülen lai sorkar tasen akümtsü atema Delhi LG dang asüngdanga liasü.

“September 21 nü Atishi-i Delhi Chief Minister tenangzükba agitsü. La den külemi minister temia tenangzükba agitsü,” ta Aam Aadmi Party-i sangdong ka ajanga metetdaksü.

Mongolbarnü AAP lenir Atishi-i, CM menden toktsüsang Arvind Kejriwal-i la dak melung lemtetba atema pelar saka pai CM menden

toktsüba atema la jashir, ta lemsatepa liasü.

“Mezüngbuba nung, ni Delhi nung kanga nüngtugu Chief Minister, AAP national convener aser kü tesayur Arvind Kejriwal dang pelar. Pai kü nem khuret tulu agütsüba aser kü dak melung lemtetba atema pelar. Tang mezüng yimtenren nung ajemoka inyaker ka state ka nung CM akümer. Iba ama ya AAP nung dang inyakteter, Arvind Kejriwal lenisüba nung dang inyakteter. Ni tongmelang kibong ka nungi lir. Ni tanga party ka nung ali asübo kü nem election nung tokteptsü atema ticket magütsüla,” ta lai ashi.

Kejriwal-i aniba sorkari nung Atishi-i education, finance, revenue, PWD aser Power densema department 13 bena liasü.

Tang Delhi Cabinet nung CM densema züngsem tenet lir aser Chief Minister tasenba den Cabinet nung züngsem ana kümsükji mapang tatsüka dang asütsü, kechiyong sangküm February ita nung Delhi Assembly elections agitsü.

Haryana assembly election atema BJP-i party manifesto saya



September 19, 2024 nü Rohtak nung Union Minister aser BJP National Tir, J.P. Nadda, Haryana Chief Minister Nayab Singh Saini aser State BJP Tir, Mohan Lal Badoli nungeri Haryana Assembly elections atema party manifesto sayatsü dang tangokba noksa nung angur.

New Delhi, September 19 (Agencies): Brihostibarnü Bharatiya Janata Party-i Haryana Assembly elections atema party manifesto sayaogo; Haryana nung October 5 nü election agitsü.

“Sankalp Patra” ta ajaba manifesto nungji alu nungi züsentetba chiyungtsü 24 atema aluyimertem nem minimum support price (MSP) agütsütsü nangzükba lir aser state nung tetsür ajak nem ita shia sen 2,100 agütsütsü nangzükba lir.

BJP manifesto nungsa lanur lakh 2 nem mapa agütsütsü nangzükba lir.

Rohtak nung Union Minister aser BJP National Tir, J.P. Nadda, Haryana Chief Minister Nayab Singh Saini aser State BJP Tir, Mohan Lal Badoli nungeri Haryana Assembly elections atema party manifesto saya.


Iba sentong nung jembidang

BJP Tir, JP Nadda-i, “Onoki tanen makai Haryana tenzükker aser maneni tenzüktsü atema nenoki khuret tulu abentsüla. Onoki nangzükba ama onoki inyakogo, onoki menangzükba a inyakogo aser onoki kechi nangzükdir yamaji inyaktsü,” ta ashi.


BJP indang manifesto nung kanga tongtibang tenangzükbatem rongnung-Laado Laxmi Yojana kübok tetsür shia nem ita shia sen 2,100 agütsütsü, alu nungi züsententba chiyungtsü tapu 24 atema aluyimertem nem MSP agütsütsü, lanur lakh 2 nem sorkar mapa agütsütsü, IMT Kharkhoda kübok industrail city 12 tentetsütsü, yimti shia nung lanur entrepreneurs 50,000 nem senotsü teyari agütsütsü, Chirayu-Ayushman Yojana kübok kibong shia nem sen lakh 10 shi jenjang angati treatment agütsütsü aser

National Apprenticeship Promotion Scheme kübok lanurtem nem senotsü teyari agütsütsü nangzükba lir. Sorkar hospital tem nung dialysis angati agütsütsü, district shia nung Olympic Games nursery, Har Ghar Grihani Yojana kübok gas cylinder ka nung sen 500 agütsütsü aser Awal Balika Yojana kübok yimtsüngtem nung college azünger shia nem scooter agütsütsü. KMP Orbital Rail Corridor yanglutsütsü, Vande Bharat train tasen agütsütsü, Haryana nungi India nung aliba sorkar college balala nung medicine aser engineering azünger OBC aser SC kaketshirtem nem scholarships ajak agütsütsü nangzükba lir. BJP-isa South Haryana nung international level nung Aravalli Jungle Safari Park ka amenoktsütsü nangzük.

MULUNGEN O



Tasoba Anogo
1st June 1948



Tasüba Anogo
13th Sept 2024

ASÜR TSÜRABUR NOKENLEPDEN

Tanü na onok nungi pilar kanga nemjema bilemer, saka nü tasütait, taremzük aser temeim yimyatem onoki teti menungra bilemteter.

Ozü asüko mapang ana aser talang nungi nübu aser rongsen agi yariteper ajak dang kanga pelaba lemsateper. Ozüi meyiba agütsütsü kecha maka saka asen Teyanglur Tsüngremi nenok taküm aser kibongtem moajangma ta ozü sarasadem.

~ Temeim Kinungtsü, Jala Jabaso,
Semchir aser Kinungertem.

US semdangba mapang PM Modi-i Donald Trump ajurutsüa akok

New Delhi, September 19 (Agencies): Taruba Quad senden aliba mapang nung Ato kilonser Narendra Modi-i taoba US Tir, Donald Trump semdangtsüa akok ta jembidar, ajisüka Brihostibarnü Ministry of external affairs (MEA)-ibo osang tejangja memetdaksü.

Brihostibarnü osangbenertem senden ka nung tasüngdangba langzüdang foreign secretary, Vikram Misri-i, “Tang Ato kilonser den senden aika mendar, aser onoki sentongtem yanglutsü merangdar,” ta dang ashi.

Quad senden mapang nung Ato kilonser Modi-i Donald Trump ajurutsü asü?, ta asüngdangba langzüdang Foreign Secretary-i, “Tangbo ni nenok dang pai (Modi) shibasa ajurutsüar meshitetsü. Senden amentsü atema lemteter asü melemtetar meshitetsü,” ta ashi.

“Mapang kobiba angutsü aser shirnoksa ajurua senden amentsüar ibaji onoki shisadangdar. Item senden atema osangji onoki maneni nenok nem metetdaksütsü,” ta pai ashi.

Tan hopta tetenzüklen taoba mapang US Tir, Donald Trump-ibo, Ato kilonser Narendra Modi-i pa ajurutsü atema US semdangtsü, ta metetdakja liasü.

Flint, Michigan nung sentong ka nung jembidang Donald Trump-i Modi ya jangratemtsü lenir ka lir aser US nung tena ajuruteptsü, ta metetdakja liasü.

2019 küm Ato kilonser Modi-i US semdangba mapang nung Texas nung ayongzükba “Howdy, Modi!” sentong nung Modi aser Trump napronglai shilem agia kati ka tenüng sangtepa liasü. Iba sentong nungji nisung 50,000 dak tali aden.

Israel atema bangzüng ka asoshi vote agütsütep; India-i shilem magi

New Delhi, Rongjui/September 19 (Agencies): Bodhbarnü UN General Assembly (UNGA) nung bangzüng ka renema Israel dang ita 12 tsüngda Occupied Palestinian Territory toktsür oang ta akhangtsü atema vote agütsütepba nung India-i shilem magi.

Züngsem 193 aliba UN General Assembly nung Israel nem iba takhangba agütsütsü atema benokba bangzüngji pusema linük 124-i vote agütsü, linük 14-i ibaji anema vote agütsü aser India densema linük 43-ibo vote agütsütepba nungji shilem magi.

Occupied East Jerusalem aser Occupied Palestinian Territory nung Israel-i inyaksangshiba dak sendakba nung 10buba emergency senden aliba tiyongtsü mapang nung ka iba bangzüng renema vote agütsütepba liasü.

Vote agütsütepba nung shilem magiba linüktem

rongnung India den Australia, Canada, Germany, Italy, Nepal, Ukraine aser United Kingdom densema liasü. UK-ibo linük ana tentetsü pusemer saka vote magütsü aser Japan-i iba bangzüng pusema vote agütsü.

Israel aser US densema linük 14-i iba bangzüngji anema vote agütsü.

Iba bangzüng nungjaji English oshi nung yamai lir, ‘Advisory opinion of the International Court of Justice on the legal consequences arising from Israel’s policies and practices in the Occupied Palestinian Territory, including East Jerusalem, and from the illegality of Israel’s continued presence in the Occupied Palestinian Territory’.

Bodhbarnü agizükba bangzüngji ajanga Israel dang tekeraba nung Occupied Palestinian Territory nungi aienshütsüla, kechiyong ibaji international teinyaktsü anema lir, anungji ita 12 tsüngda yamaji inyaktsüla, ta akhanger.



TIR YIMYIM YIMOBILEM (EDITORIAL)

DIMAPUR ROGONÜ, SEPTEMBER (RONGJUI) 20, 2024

Govt. school-tembo koda ?

Tang ajungbenaka Nagaland government-i Nagaland nung private school 13 shibangtsür ta angashi dang Government school-tembo koda (?) ta jet ta temulungi arur, kechiyong private school-tem dang nungi government school-temang tamajungba, anungji school tamajungtem kong tazünger mali aser kong shisaliok junga magütsütetter, itemji shimteta shibangtsüdi asünungbo, private school-tem dang nungibo government school-temang teimba shibangtsüsa akümtsü. Ano, private school nung tazünger maliba agibo government makoksar saka government school nung tazüngerbo mali saka tesayurtembo yoker ta asüba agibo amajok nung nübertem meyong government senpong nungi sen aika amajok nung lalushiponger. Aji oda, government-i pei school-tem dang nungibo private school-tem nungang tenük teyokba yokbaji pei chirnur majungbabo mangu ama toktsür tangar chir merenshir amai lir. Atangji, private school-tema government kübok tazüokba nung lapokdaksür, anungji mejungra shibangtsüsübaji tim. Ajisüaka, private school-tembo government-i senotsü teyari agüja ayuba kaketrejtem masü, anungji tazünger melira government-i meshibangtsüyonga peisasa shibangtsü. Item inyakyim aser tensa tiaji kodang government school-tem dena medemdanga bilemdangdir, Nagaland nung tazünger kaketshirtem maliba government school-tem dang masü saka tesayur peria maliba school-tema aika lir aser ano tazüngerbo mali saka tesayurtembo talila aika lir ta asüba school-tema aika lir. Ano tangar dang nungi balaka Nagaland nung angutsüba mapa kaji, government school aika nung kaketshirtem dang nungibo tesayurtemang teimba aliba school-tema lir. Item nungji amajok nung government sen dang masü saka temetetba aser sempet tajung akaba tesayurtem aika amajok nung arishi anogo süitemdaksür. Ashiko, government school nung inyaker tesayurtem aikati pei school nung tazünger maliba agi school-i mao ser angati ita sen agizüka agibaji jangratemtsüka ta bilema alitsüa akok, saka aji kodang jungjunga bilemdangdir, alima nung mapang tatsüka alidang mapai mao ita sen chia alitsübaji amajok nung mapang endoka alima nung amonger asütsü. Ibaji angateta, akok tashi alima nung tasor temang mapa inyaksüsa nübo junga kümerbo, pei bok asüngtsü asoshi dang masü saka pei dak aketba tashi, temetetba aser sempet agi nisung kar nembosa tajangzük aser teyari agüja tenzüktettsü asoshi government sentong nung alitsüla. Nagaland nung tanübo tesayurbo shim saka tesayudak mali ta amajok nung ita sen atema government senotsü lalubajibo yutsür, tesayur takümüji amajok kümdaksür aser pei lima asoshi tajung inyaksü jangraba tanela rosepdaksür. Joko, Nagaland government asoshi School Education department ajanga inyaksüba mapabo ana dang lir, kaji tazünger maliba aser menüngdakba government school-tembo shibangtsüla aser tazünger aliba school-tem nem tesayur shitak agüja kanga junga anepalutsüla. Iba amaji ka meinyaktetra, tanabuba teinyaksüjibo government school ajak shibanger private nem anepaludaktsütsüla. Aji oda, idangjibo private school süaka kaketshirtem dang sarutsüba fee aser tesayurtem nem agütsütsüba ita sen ajak government-i latettsütsü aser government-ia küm shia school yari senotsü teyari agütsütsü ta asüba inyakyim nung aotsü bilemstsüla. Iba ama inyakyim tasen jagi government sen kümzükba dang masü saka bendanga agüja sayutsü jangraba tesayurtem nem pei lima aser nübertem asoshi tajung inyaksü maongka agütsütettsü. Aji oda, asen lima aser asen libaliro jenjang tanü dang nungi asüng tajungba asütsüba tashi, tangatetba aser tangazükba ajak kaketreju nungi tenzüksü aser item sentongtemji tesayurtemi sayutsü. Iba ama alima mapang ka kodang asenoki yanglutetdir, idangjiang asen lima nung school tesayurtemi asen lima tajungba küma yanglushitettsüsa alima aser nübertem meimba ochishir, aser tashitemetetertem pei sayuba school-tem nungi adokdaksütettsü.

OLEMSABANG

TOKLANG TENZÜKER KÜMSÜK

- P.Renthy Jamir.

(Yashi adok nungi...)

Yamaji nisung ka koma arishi küm tainbo akümer temetetba shisatsü mongin küma teshisadang lia tali ajemalushir nübur tenzükba wadang nung shilem agir. Shin O nung ashiba ama arishi küm tenem tashibo züzüa takumji süidaktsür. Aji oda alima rangben nung meimchir arishi küm 5.5 talila renlokogo (2000 to 2016) (Global life expectancy up 5.5 years) ta angashia Aor tashi temeteter yim tulu tila aser Town jila ajak nungi atenshir ABAM nung Toklang tenzükertem atema aritepa temzüng yanglushi tejenba nung arishi küm 65 mesüra tenzükba küm 35 nung mapa nungi anen. Saka tasenba temzüng nung yamai renema ayu. Ocet XVI A. Tenzükertem .ABAM nung tenzükertem shimba aser anenba. B mapa nungi anenba- Tenzüker ka arishi kum 60 (roker) mesüra tenzükba küm 30 (semer) ana rongnung koba tama abensadir tenzükba mapa nungi anentsü. Iba temzüng yanglushiba ya 30th November 2016 nung lateta aser agizüka ayu. Alima rangben küm 5 sür point 5 agi up saka tia maka ABAM toklang tenzüker küm 5 down .Aser iba temzüng ya Aor pastor (temeteter) ajaki toku menokshir pelatepa agizüka ayu. Saka tang pastortembo arogotemi küm 65 nung sodi agiang asüandang atsüayonger.

Ano karbo küm 60 nung monüi odaktsüba angashir. Kechiyong arogo ka nung kodang toklang tenzüker ka agi nübur laktetdir ABAM nungbo küm 60 ang ta tebang atsüker. Shibai metet 2016 nung ya ABAM toklang tenzüker kar yakta sodi odaktsünüa bilem südi. Kechiyong inyaker ajakbo tabensa masü. Saka Lai nungbo tamajung inyaker aliyongbo nai tashishi A- S-24-19 ta ashir. ABAM toklang tenzükertem ya government servant masü aser tagitarutsü (facilities) nonganongabo mangur. Anungji shisemba ajak ya asadanger arishi küm ya tera talangba süklökja inyakdaksü nung Aor takoksa tulubo masütsü.

Tatem nung lim arogo nung toklang tenzüker oda pastortem ta shidi. Tang ABAM kübok Ao arogo 169 aser Fellowship 15 lir. Fellowshipji tokja lir 169 nung arogo 82bo kibong 100 majung ano yangjia tesadang kabo kibong 50 majung ano kibong 20 majunga ishika lir. Anungji Fellowship dena pastor 184 ji libaliru standard balala. Dimapur, Kohima, Mokochung pastortemi Gari Bolerojibo yutsür Innova agibo tenük masünger saka Phek Nakachari Anaki arogotem nung Tenla ki pastorbai aoktsüla Tsüngtsünga pai metemra tatemer mali aser item arogotem nung SENIOR pastor ta JUNIOR ta malemsateter. Ita shi pocket melemer aon tasen khen melena pulfit melenteptsü arogo tashi agi makoker. Parnok ajak pastor SANNÜKER ta ajar tepok tipena kasasa lir. Ano tia maka tulubaji Arogo tila nung inyaker tem talangka zünger temsüa langa lir saka reverend angutsü lenmang mesademer. Kechiyong arogoi pension magütsütettsü.

Tang tenzüker nem agütsütsü maka nung nisung asem pezü tashi nem pension magütsütettsü. Ano ya metetdi tamangertem ya tali terenlokba aotsü masü azüla-ang aotsü Joko aonung sentepibo tarur mali. Aji alima ajak nung, Mizoram nung 1900 nung tamanger 19 dang alidang Welsh Missionaries J.T.Lorrain aser F.W.Savidge aru küm 107 süia aodang Welsh lima tamang azüla aor anungji iba azüla-aoba (Wanning faith) asentenshitsü Mizoram nungi senior pastor Rev.Sangkhuma Welsh arogo dangi 8-1-2002 yoker. (To revive Welsh Wanning Faith) Germany lima nunga khristan tamanger million tesadang ka 2022 küm arogo toktsüogo ta Tir Yimyim 1-7- 2023 nung nguogo. Arogotem nung küm shia Revival sentong ayonga agiba yabo UJA TEPEN nung mi tsüloktsüba den kasa dang lir. Anungji teraksa lima kong tamang azüla aor iba putu nung ya theology azüngtsü pur ajak ya sempet alir tamang nung takang ochishia tila kümer timtem arema tenzüktettsüba , sen meimer masü pabo pastor tebuttsübo government servant ta masü kibong rangben bendanga tenzüksüpur azüngtsüla .Ano arogotemi pei arogo yari pastortem nem tim metümdaktsüi taah agütsütsüla. Tatem nung ajak ya asadanger ABAM toklang tenzüker tem ya tenzükba mapa nung küm terabo süklöktsütsüla .Kechiyong tenzükertem mapa nungi pelashishia anenbaji ajak asoshi temoatsü tulutiba ta bilemba shisa lemsateper.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agütsü mepishir

Indonesia nung Arogo katibo küm 11buba moapu nung tekülem agir



September 19, 2024: Indonesia linük nung Tenla ki asütsü atema temelaba magütsüba agi Arogo aikati moapu nung dang tekülem sentong agia arudar; yamaji Kartasura District nung aliba Indonesian Christ Congregation Church-Millennium Peace (GKJI-MD) Arogo nunga züngsemtemi Kartasura Terminal anasa moapu ka nung tekülem sentong agia arudar, ta International Christian Concern (ICC)-i metetdaksü.

Parnoki anü tatsük nungi kümzüksü atema süki tulu meyangba sülen ali nung pakti lemer tekülem sentong agir.

Arogo karibo Tenla ki liaka sentong temeja agidangbo moapu nung agir saka GKJI-

MD Arogo nung züngsemtembo tesüiba küm 11 tashi moapu nung dang tekülem sentong agia arudar, kechiyong Tenla ki asütsü atema parnok nem permit magütsür.

Iba Arogo nung Pastor, Ari Suksmono-i, küm 11 tejaklen Arogoi Kartasura ditrikt kübok Wirogunan yimdak kimong ka alizüka liasü, ajisüaka Interfaith Harmony Forum (FKUB)-i recommendation magütsüba agi tang tashi kimong nungji Tenla ki mesüteter, ta ashi.

GKJI-MD Development Committee nung tongti, Stefanus Marsigit-i, 2016 küm committee-i Joint Regulation of the Minister of Home Affairs & Minister of

Religious Affairs dang temelaba meshia liasü.

Item temzüng kübok tekülem ki asütsü atema telatetba kar abensatsü nüngdaker; item rongnung tekülem kidang züngsem züngya telatet, iba tesem nung alirtemi pusemstsüla aser Ministry of Religious Affairs o Interfaith Harmony Forum na nungi recommendation alitsüla.

Iba Arogo nung züngsem peria lir aser iba tesem nung alirtemia pusemer, ajisüaka Interfaith Harmony Forum-i recommendation magütsüba agi tang tashi Tenla ki mesüteter, ajisüaka GKJI-MD-i maneni moapu nung tekülem sentong agia atatsü, ta Pastor, Ari Suksmono-i metetdaksü.

India nung US Evangelical Organization ka anema ken o benok

September 19, 2024: India kübok state pezü nung ketdangsertemi India nung Evangelical organization Joshua Project anema ken o benokogo.

Iba organization ya US nung amenoka lir.

Tribal nütsüng aika aliba Madhya Pradesh, Chhattisgarh, Odisha aser Jharkhand state tem nung ketdangsertemi Joshua Project indang mapatongtem anema report agütsü aser iba osangji Hindi oshi nung adokba osangkaket 'Dainik Bhaskar' nung adoktsü.

August ita nung iba ocet/report ji osangkaket nung sangdongba sülen state pezüi iba organization anema ken o benok.

Joshua Project indang website nung alima nung nisungtem group balala database adoktsüba den külemi Khrista osangtanjung kangabo mangshiba tesemtem metetdakja lir, aser item data ji shidak masü, ta Hindi osangkaket nungji sangdonga liasü.

Khristan missionary organization aika asoshi Joshua Project indang database

ji kanga tongtibang, kechiyong iba data nungji ajemdaker missionary temi alima tesem balala nung tenzükba wadang kong inyaktsüar meteter.

Dainik Bhaskar osangkaket nung adoktsüba report ajanga ashiba agi, iba osangkaket nung inyakertemi state pezü nung Joshua Project indang mapatongtem bushisüngdanga liasü, aser ibaji ajanga ozüng alema tribal nisungtem Khristan yimsü dangi meyipdaksüba jangja.

Taoba mapang Joshua Project nung staff züngsem ka dang asüngdangyaba ajanga Joshua Project indang mapatongtemji tejangja metet, ta report nungji shia lir.

Iba nisungba jagisa pa nem itasen kwi agütsüar metetdaksüba den külemi India nungertem Khristan yimsü dangi meyipdaksütsü atema inyaksangshiba tasa balala metetdaksü.

Ajisüaka International Christian Concern (ICC) staff kati ashiba agi, iba report ji taoba mapang Project nung inyaker ka dang asüngdangyaba kija nung ajemdaker renem.

"Iba denji külemi tribal

region aika nung Khristan nütsüng arenba nung ajemdaker iba osangkaket jagi parnoki melung melemi bilemba nung ajemdaker report ji renem. Ajisüaka ozüng alema yimsü meyipdaksüba kuli mali," ta ICC staff kati metetdaksü.

Dainik Bhaskar osangkaket nung adokba osettemji ajanga right-wing Hindu teloktem kanga jashidaksü, anungji parnoki Madhya Pradesh, Chhattisgarh aser Odisha state tem nung minister tem aser MLA tem nem iba osangji metetdakja liasü. Iba sülen sorkari yarisema Hindu yimsü alia amangertemi Joshua Project anema ken o benok.

Chhattisgarh nung Home Minister Vijay Sharma-ibo ozüng alema yimsü meyipdaksüba nokdangtsü atema ozüng tasen ka benoktsü aser tribal nisungtem li nung asüba Tenla kitem agientsütsü, ta metetdaksüogo.

Odisha nunga tongti ketdangser kati chief minister dang Joshua Project anema bushisüngdang tenzüksüla aser state nung aliba Tenla kitem osang bendentsüla, ta mepishiogo.

ANOGO ABEN TSÜNGREM DEN

Asentenshi Yimya

T.Ken 119:88

Ne temeim yimlibilem yari ni rokasoa kümdakjangma. Angji Ne bang ozüng ni bilemtettsü. T.Ken 119:88.

Kodang metsü tsüngküm indang jembir aiktati naro apungba, ozü asaprangba aser rem lanu adokba bilemer. Temesüktep sayutsüngiren nendakba arogoi, metsü mapang bilemdang, tsüngküm den peta asentenshi mapang alitsü bilemer. Asenoki küm shilem ama arogo calendar nung asentenshiba anogoji meinoki chichiba asentenshi rongdak yimya nung rangloktsü bilemstsüla.

Chichiba asentenshiji teloki mejungjai ajangshibaji masü. Iba nung peisasa azüokba aser alima yimya indaktsüba dena lir. Asentenshi nung itemji paidoktsü makok. Chichiba asentenshiji kijai mesüra million kati ajangshitsü akok. Anungji ajaki külemi peisasa azüoktsü aser temenen toktsütsü matateptsüla. Asentenshi kija aser asenok teinyaktsüji agizüksüba tang.

Ano, tesüiba kümtem nung Khristantemi ajangshia aruba asentenshi ama alitsü bushiba asenoki intoktsüla. Asentenshi shia tanga mapa ama masütsüa akok. Chichiba asentenshiba nung Tsüngremi mapa tasen inyaker.

Shirnoki asenok mapang nung asentenshi adoktsü imlar, iba mapangji tang teka nung lir ta ajang ajanga lir ta sayuba temaitsü lir, anungji renemang!

Itemi shisadangang: Tsüngremi na Nübusen ka asütsü yanglu. Kechi koma Nübusen na asütsüla? Tsüngremi na Nübusen ka asütsü yangluba jakla asem shiang. Nai iba ama nülenji süner asü? Iba nübu akümstsü nai kechi inyaktsüla? Kechiba tang aji meinyaker?

Sarasadem: Nisung ka süra, pa tanaben alitsü asü? Yob 14:14.

Tenangzükba: Kechiaser ni taküm lir, Pai tanaben taküm alitsü. Yohan 14:19.

Khristantem amakba anema Chhattisgarh Youth Forum-i longkak aittsü

Bijapur, September 19

(Agencies): Ita ka tejaklen Chhattisgarh nung Bijapur district kübok Kosalnar nung

Khristantem amakba sülen tang tashi aibelenertem meputetba atema September 23 nü yimten lenir, Narendra Bhawani leniba nung Chhattisgarh Youth Forum (Chhattisgarh Yuva Manch)-i Dantewada Superintendent of Police (SP) office kima longkak aittsü, ta metetdaksüogo.

August 23, 2024 nü Khristantem amakbaji local BJP lenirtemi aser RSS nung lenir kari ajungmesoba agi lir ta melung melemi bilemer.

Bhawani-i ashiba agi, Kosalnar nung lokti jagi Khristantem dak kanga mejungi azük aser ibaji ajanga parnok aikati yimtsüng toktsür ajen.

September 16 nü pai sangdong ka ajanga, "BJP lenirtem aser RSS nung Kosalnar yimdak lokti jagi amakdang Khristantem dak taochi makai azük. Amakbaji ozüng alema liasü, ajisüaka tang tashi aibelener shinga mapu," ta metetdaksü.

Chhattisgarh Youth Forum-i sangdong ka ajanga, iba ama tatalokba ajanga Khristantem kanga aoksadakja parnok aikati

pei ki toktsür jenogo aser aika kidangi meyipa marui anasa aliba yimtsüngtem nung jenoka lir, ta metetdaksü.

Iba tatalokba sülen ketdangsertem nem ken o agütsü, ajisüaka tang tashi aibelenertem mapur, ta Bhawani-i metetdaksü.

"BJP nung inyakertem aser RSS züngsemtem Kosalnar yim tonga aoba sülen parnoki Khristantem dang o tamajung ashiba dang masü saka tepsettsü ta amokmeren.

Parnokisa Khristantem dang nenoki Khristan yimsü metoktsüra alu aruhtsü atema nenok nem temelaba magütsütsü, ta amokmeren," ta Bhawani-i ashi.

Tang tashi aibelener shinga mapuba atema Chhattisgarh Youth Forum-i September 23 nü longkak aittsü. September 23 tashi nungji kecha meinyakra nisung meyrjang aikati Dantewada nung aliba SP office longbanger aibelenertem aputsü atema takhangba agütsütsü, ta parnokisa metetdaksü.

Ketdangsertemi kecha meinyakra parnoki Divisional Commissioner office nung longkak aittsü, tesüsabo Raipur nung aliba Home Minister kima longkak aittsü, ta metetdaksü.

AO OSHI ANGAZÜKDAK:
TANÜ ANGAZÜKTSÜBA OJANG



Tanga

(adj) anosa (even now)

* Tsüngremibo tanga asenok moatsüner.

Tanganütsü

(adj) o aser ken tajung tenarongi angashiba (pleasing to ear, pleasure to listen)

* Anungbai tanganütsü kentem atener.

OLONG PAITEP # 6929

	1			2	3			
4			5					6
					7			
	8							
	9			10			11	
					12			13
14								
					15			

TIPLIN		LANGTSÜNGLEN	
2. Sü jeplok	-(4)	1. _____ i	-(4)
4. O agi merenshi	-(5)	3. Kasa masü	-(6)
7. Ayongküm li	-(5)	5. Nüchi masü	-(5)
8. Chiyungtsümapang süiadok	-(4)	6. Tashi endok	-(5)
9. Tsüngrem den jembiba	-(9)	9. Langtem	-(5)
12. Saklok	-(4)	10. Anü malidang	-(6)
14. Samaba mebushitet	-(5)	11. _____ kibur	-(5)
15. Mejanga onü	-(5)	13. Tebur tembar tsüngda jatepba	-(4)
16. Tzü shiruru ka	-(4)		

OLONG PAITEP # 6928 TELANGZÜBA

TIPLIN :	LANGTSÜNGLEN :
1. Semtu, 3. Lepko, 5. Bilem,	1. Sayu, 2. Teb, 4. Kimong,
8. Ulu, 10. Tsüngpang,	6. Lungkak, 7. Milak,
11. Tesangwa, 13. Aoksa,	9. Zünga, 10. Temopu,
15. Putir, 16. Yipru.	12. Walu, 14. Ali.

Tripura: Agartala nung sen lakh 12 alang Phensedyl apu

Agartala, Rongjui/September 19 (Agencies): Tripura Police-i state yimtiba Agartala kübok Nandan Nagar nung Khakchang Residential Complex kübok shishilembadak takdang tazüing ka nung sen lakh 12 alang tenokdangba agütsür aliba cough syrups puogo.

Local tem küm küma aliba ajanga tenokdangba agütsür aliba osettem puogo aser iba ajanga ozüing alema inyaksangshiba maparen nokdangtsü asoshi nüburtem küm küma aliba sayur.

New Capital Complex indang Sub-Divisional Police Officer (SDPO) Subrata Barman-i ashiba agi, mamshiba takdang ka nung juli aika agizüka ayuba anguba sülen iba tesem nung alirtemi temulung

melemi bilema liasü. "Local tem kanga küm küma aliba ajanga onok nem temulung malemtsüsa inyakba maparen indang metetdaksü. Ozü team iba tesem tonga aoba sülen juli 35 nung tenokdangba agütsür aliba cough syrup bottles 6,000 shi nguteta liasü," ta SDPO Barman-i ashi.

Aibelena alirtem police maru tsüngda iba tesem nung jena otetaka, tenokdangba agütsür aliba mozü aika apuba ajanga iba tesem nung temesepba mozü shibelenba ajanga timtem agütsüba sayur.

Tenokdangba agütsür aliba cough syrup ya shishilembadak sen lakh 12 alang asütsü ta asatetogo aser ketdangsürtem iba temesepba mozü shibelenertem aputsü atema rangloker inyakdar.

Kolasib nung ali kiburtemi highway nokdaka ayutsü ayongzük



Mizoram kübok Kolasib district nung Land Owners' Association Joint Action Committee-i mapang telatet makai lenmang nokdanga ayutsü.

Aizawl, Rongjui/September 19 (Agencies): Mizoram kübok Kolasib district nung Land Owners' Association Joint Action Committee-i, September 25 anepdang 6 ako nungi tenzüka mapang telatet ka makai National Highway-306 aser National Highway-6 nokdanga ayutsü ayongzükogo.

Parnoki ali dak sendakba nung ken o mebenteti aliba bentettsü atema state sorkar nem takhangba agüja tang iba longka aiba sentong ya ayongzükogo.

NH-306 aser NH-6 na sendaktepa lir aser iba yagi Mizoram yimtiba Aizawl aser Assam nung Silchar jila na sendaktepdaksür.

Iba ya Mizoram nung aliba nüburtem asoshi kanga tongtibang lenmang ka lir, kechiyong iba lenmang ajanga

khu ajak belener. Association-i ashiba agi, Kolasib nung aliba nüburtem ali dak sendakba nung küm asem dak tema sorkar den mangatetep adoka arudar.

Parnokisa, state forest department-i national highway den atonga aliba alitem roadside reserved areas ta sangdonga parnok ali mamshidaksür, ta ashi.

National highway tem tang four lane küma ulushiba ajanga forest department-i, Roadside Reserve Forest notification, 1965 kübok national highway tem nung anatsülen ali meter 800 ya Roadside Reserve Forest ta sangdongogo. CA/NPV compensation agizüktsü mechi parnoki iba jenjang agiogo.

Association-i ashiba agi, forest department-i taoba mapang national highway tem

nung anatsülen meter 800 ya Roadside Reserve Forest ta yimjak nung kodanga sangdonga mali aser parnoki item tesemtema anepalua arua mali.

National highway temeket nung tesemtem ya nüburtem alitsü, süngtonlidong atemtsü aser tanga mapa balala atema küm aika amshia arudar, ta parnoki ashi.

Land Owners' Association-i Mizoram sorkar dang 1965 notification agintsü aser ali mamshitsü atema tetuyuba agütsür aliba agintsütsü mepeshia metetdaksüogo. Parnoki ashiba agi item alitem ya nija meyong lir.


Maneni parnoki state sorkar dang NH-306 aser NH-6 four lanes küma ulushiba maparen takaratiba nung inyakyonga aotsü mepeshia metetdaksüogo.

Manipur nung Amur Falcons akhaba & shishilembaba nokdangogo

Imphal, Rongjui/September 19 (Agencies): Manipur sorkari state kübok Tamenglong district aser iba meketa aliba tesemtem nung Amur falcons maputsü, makhatsü, metepsettsü aser shishilemba masütsü tenokdangba agütsüogo.

Tamenglong District Magistrate-i, air gun ajak yimtsüing nung ketdangsürtem nem bendanga agütsütsü tetuyuba ka agütsüogo.

Yimtsü nung ketdangsürtemi air gun tem ya November ita tatembang tashi mesüra molulum ozü ya migration



Amur Falcon

metembang tashi yua atatsü. Iba tetuyuba sülen tashi anga manidakertem anema temzüng ozüing dak ajemdaker jenjang teashi agitsü, ta

ketdangsürtemi metetdaksüogo.

Amur falcons ozü koba dang local temi 'Akhoipuina' mesüra 'Kahoipuina ta ajar iba ozü ya South Eastern Siberia aser Northern China nungi arua Manipur aser talisa Tamenglong district aser kidanger Nagaland nung October tom nung anenzüker.

State nung ita ka shi mongzükba sülen item ozütem ya south aser east Africa-i aoer idakji mapang tatsüka mongzükba sülen maneni parnok chiemdak bushia aoer.



GOVERNMENT OF NAGALAND
DIRECTORATE OF TECHNICAL EDUCATION
Nagaland : Kohima - 797 004



NO.DTE/SCHO-10/2024

Dated:Kohima,Sept,2024

NOTIFICATION

This is to inform all the Students belonging to Schedule Tribes of Nagaland pursuing (Diploma/ Undergraduate and Post graduate courses in EngineeringInstitutes (both fresh and renewal) within India, recognized byAll India Council for Technical Education (AICTE)& Council of Architectureto complete online registration for scholarship for the session 2024-2025w.e.f20th September 2024 to 30th November 2024, through the Common Scholarship Portal.www.Scholarship.nagaland.gov.in

(Er. VIPULHOU LHOUNGU)
Director.

Palestine nungner bhukuma UNGA nung pangzüng renem

New York, Rongjui/Sept. 19 (Agencies): UN General Assembly-i Palestine nungneri renemba pangzüng ka agizükogo, koba ajanga Israel nungner Occupied Palestinian Territory nung aliba ita 12 tsüngta tembangsü khanga lir, saka iba pangzüng ya ozüng kuma renemba masü.

Iba pangzüng ya bhukuma vote 124 liasü, Israel densema linük 14-i iba pangzüng anema vote agütsü aser linük 43-i shilem magi. Palestine ya non-member observer state ka asünung, vote magütsütet.

Iba pangzüng ya July ita UN indang tematiba court nungi 'advisory opinion' ka agütsüba nung ajemdaker lir, koba ajanga Israel-i West Bank, East Jerusalem aser Gaza Strip amokbangba ya international law anema lir ta ashir.

Palestine ambassador-i iba vote ya nüchiso aser ochi obendang asoshi onok timtema aruba nung temelenshi tenzüka mapang alitsü ta ashir. Ajisüala Israel ambassador-i iba pangzüng ya "diplomatic terrorism" lir ta ashir.

General Assembly indang pangzüng tem ya mapa ozüng ama mapa kuma mamshiaka iba yagi UN nung züngsema aliba linük 193 indang tangatetba sayur aser yimtenren tsütsü retreta repranger.

Hamas telungpuri October 7 nü Israel amakdang nisung 1,200 shi tepseter ano nisung 251 pua bener aoba sülen Gaza nung rara küm ka jungnüa aruba mapang ka nung iba pangzüng ya renemer.

Iba sülen Gaza nung nisung 41,110 dak tema tepsetogo, ta yangji aliba Hamas meyong health ministry ajanga ashir.

Kasa mapang West Bank nunga azüdokshi tali kumogo

aser yangji Palestine nungner 680 dak tema aser Israel nungner nisung 22 tepsetogo, ta UN-i ashir.

International Court of Justice (ICJ) nungi aruba 'advisory opinion' koba ozüng agi alena mali, iba obendanger 15-i kumtetba panel yagi Occupied Palestinian Territory nung Israel nungner maneni aliba ya ozüng agi memelaba aser ozüng agi memelai aliba akok tashi tekeraba nung anentsü linük teinyaksü lir, ta nguteta liasü.

Occupied Palestinian Territory nungi Israel-i settlers ajunga ainshidaksütsüla aser teraksa agütsüba atema temelen teyari agütsütsüla, ta court-isa ashir.

West Bank aser East Jerusalem nung 1967 nungi Israel-i settlements housing 160 shi yanglua yangji Jews nungner 700,000 shi alir. Settlements ya international law nung aibelena amenoka anepalur ta court-i ashir, koba Israel-i khenyongi magizüker.

Court-i tiazü nung telemtetba ka agiogo aser pei li nung Jewish nungner ya occupiers masü, ta iba mapang Israel indang ato kilonser-i shia liasü.

Ajisüaka Bodhbarnü General Assembly pangzüng yagi ICJ sangdong agizüka liasü.

Parnoki iba pangzüng nung Israel dang memonui Occupied Palestinian Territory nung ozüng alema aliba tembangsü aser ibaji ita 12 majungdang inyaksü aser international law kübok ozüng agi melaba maparen ajak memonui inyaksü takhangba agütsü.

West Bank nung amenoka aliba Palestinian Authority indang foreign ministry-ia iba pangzüng ya Palestine nungner terenlok atema kanga tongtipang aser international law

atema otsüsütsü mapang ka lir ta ashir.

US züngsem linük shilem asem nung anati iba pangzüng bhukumba ajanga tashiyim agi amokbangba tatem kati arutsü aser parnoki mapa tamajung inyakba anentsüla ta alimai angatetba sayur aser iba yagi Palestine nübur pei sasa yimsü asütsü temeden samatsütsü makok ta nenshia agizükshiba sayur, ta parnoki ashir.

Israel indang foreign ministry-i iba pangzüng ya shidak masü aser ibai asangsang nungi pilar, aser kiralongra mapa inyaksü ajungmesor aser yimjung atema teimla samadaksür, ta ashir.

"Pei jangraba indang international politics tereprangtsüji yamai lir," ta ashir.

Iba pangzüng yangi Hamas kiralongrar telok tashi itshidaksür aser kiralongraba nung tajanzük lir ta sayudaksür, ta ashir.

Palestinian Authority ajanga mangatettep bentettsü nükjidong nung masü saka Israel yirutsütsü nükjidong nung nübuyima liasü, ta aitsü aser telangzüba agütsütsü nangzük.

Iba pangzüng anema vote agütsür US-ibo jelia yongi iba pangzüng ya telok ka kisüng bhukumba lir ta shia liasü.

"Tanü yangluba pangzüng yagi tejakleni aotsü mesüra teimla atema lenmang mesayur. Iba pangzüng agizükba ajanga Palestine nungner takum mekumzüksü, pua alirtem kidangi marutsü, Israeli settlements matemtsü mesüra yimjung maparen nung tashi magütsütsü," ta ambassador Linda Thomas-Greenfield-i ashir.

Iba pangzüng atema vote agitepba nung European linük aika den Australia, Canada aser India linüktemi shilem magi.

MULUNGNEN O



TASOBA : 1941

TASÜBA : 13.09.2024

Tsürabur Asür S. WATIKUMLA (ASANGMA) 13th September 2024 anogo nung akümüli wadang temer teti alitsüba anisungzükdaki ogo. Onok shisabulu aser mangyim tia nung alidang kija, kibong, kiyonger, Arago aser lokti palalai tamang Sarasadem den nübu, rongsen shisatsü agi yariba asoshi nenok ajak dang kangasa pelaba metetdaksür. Aser asen Teyanglur Tsüngremi nenok ajak moajangma.

~ Temeim Chirnurtem, Semchir aser Kinungertem.

MULUNGNEN O



R. TONGPANGCHIBA (MERANGKONG) Aso : 1930 - Asü : 09.09.2024

Ozü Temeim tsürabur shiranga aliba mapang nungi tasüba anogo tashi kinunger, tembar, kiyonger, Arago, lokti balala aser kija kibongtem shirnokisa sarasadem, nübu, shisatsü aser rongsen agi yaritepogo aser ano shirnokisa tsürabur mang meyina pei tetsü tasoli tashi yaritepa aruogo, nenok ajak dang kanga pelaba lemsateper.

Tsüngremi nenok ajak maneni moajang ta ozü tamang sarasadem.

- Temeim chirnur, semchir aser kinungertem

Bangladesh-i tesunep nung rangloktsüla: Wickremesinghe

Colombo, Rongjui/Sept. 19 (Agencies): Sheikh Hasina'er sorkar laoba sülen Bangladesh nung yimjung tesunep tekeratiba nung arutsü asoshi inyaksüla aser linük anitsü asoshi nüburtemi telemtetba agitsüla, ta Sir Lanka Tir Ranil Wickremesinghe-i ashir. Ato kilonser menden nungi atsüngdoker alila India nung dang alitsüla aser linüki akhi yimya dangi tanaben shilangtsü atema rangloktsüla, ta pai ashir.

"Sheikh Hasina ama lenir aika pei linük yutsür bendang lima nung alir, la linük nung mali süra yamaji yujang. Asenok ajaki Bangladesh nem akhi ama tesunep nung ranglokdaksüner," ta Firstpost den sensaksem dang pa dang Bangladesh-i Hasina anir arutsü akhangba indang asüngdang dang pai yamaji langzü.

Tang mepetmesü adoka aliba nungi anitettsü, talisa kidanger linük nüburtemi India anema ola adokba mapang New Delhi aser Dhaka dang kechi ashitsü, ta asüngdang

dang, "Bangladesh nung yimjung tesunep aser akhi ama tensa dangi arudaksütsü mapa ya mezüng südaktsütsüla," ta Wickeremesinghe-i ashir.

"Mezüngbubaji Bangladesh nung tesunep alitsüla - mezüngbuba nung nübur nem temulung lemdaktsütsüla, Sheikh Hasina atema, item ya yimten ken o lir. Yimya tajungba nung lemtettsüla... Lenir aika pei linük yutsür bendang limai aor. Parnok bendang lima alir. Ni asübo Bangladesh tashi ita alitsü atema temulung agütsütsüla," ta pai ashir.

August ita nüburtemi sorkar anema nokdakba nungi azüdokshia tensa mejungi akumba ajanga Hasina ya ato kilonser menden nungi alur Bangladesh yutsür aotsüsa akum. Longkak aitba ya July ita tenzük, koba sorkar mapa nung quota atema tenzükba nungi sorkar anema apuso.

Küm 15 yimsü asüba tatem kati aruba sülen la India nung alir. Ajisüaka la India nung aliba

ya New Delhi aser Bangladesh nung Muhammad Yunus-i aniba interim government tsüngta ken o tamajung akum.

Yunus aser danga lenirtemi la linüki yokang ta akhanger, kechiaser la anema ken o 155 shi benoka lir, kong nisung tepsetba atema ken o 136, meimchir anema mapa tamajung inyakba aser kin ajunga samatsütsü merangba atema ken o tenet, nisung pua bener aoba atema ken o asem, nisung tepsettsü merangba atema ken o ti aser Bangladesh Nationalist Party (BNP) procession amakba atema ken o ka benoka lir.

2022 küm July ita nüburtemi longkak aitba ajanga tir menden nungi Gotabaya Rajapaksa aluba sülen Wickremesinghe ya Sri Lanka tir akum. Iba asetkong linük senotsü agi kanga timtemba mapang pai iba khu pngzük. Sri Lanka ya September 19 nü bankruptcy tembangsü lir aser September 21 nü tir election agitsü.

IMPUR CHRISTIAN HOSPITAL

ANM SCHOOL OF NURSING
IMPUR: MOKOKCHUNG, NAGALAND

(Permitted by State Nursing Council, Nagaland & Recognised by the Indian Nursing Council)

No. ICH/NS/GEN-1/2024

Dated 19th September 2024

ADVERTISEMENT

In partial modification to this Advertseiment dated 2nd September 2024, the following amendments are made :

- 1. The last date for receipt of applications is 30th September 2024
- 2. No of seats : 30

Sd/-

Medical Superintendent
Impur Christian Hospital

Israel-i rara shilem tasenba sangdong, Lebanon nung pagers maneni apok

Beirut, Rongjui/Sept. 19 (Agencies): Lebanon nung amanger aser iba yongji telok ana tsüngta rara tesashiba tenzüksü ta tetsübo aiddaktsür. Bodhbarnü Israel sepaitem den jembidang, "Asenok rara nung shilem tasenba tenzük. Yangji tasü tait, temulungtetba aser timtem ajuruaka maneni meranga inyakba nüngdaker," ta Israel Defence Minister Yoav Gallant-i ashir.

Iba mapa ya Israel-i Hezbollah anema inyak ta aikati

(Maneni tapak 8 nung...)

17th Imchaba Master Memorial Open Volleyball Trophy 2024 osang



Tanü mezüngbuba aser tanabuba quarter finals nung Match Patron Mokochung Press Club President Wb.Limalenden Longkumer den Mezüngbuba Quarter Final asayartsüpur Etovi Memorial Club, Dimapur aser Eastern Tornado,Tuensang pur den ano Trophy ayonger den külemi tangokba noksa nungji angur.

Mokokchung, September/ Rongjui 19, 2024 (TYO): Mokokchung District Volleyball Association-i (MDVA) ayongzükba 17th Imchaba Master Memorial Open Volleyball Trophy 2024 tanü quarter finals asayaogo.

Tanü mezüngbuba aser tanabuba quarter finals nung Match Patron Mokochung Press Club President Wb.Limalenden Longkumer liasü.

Mokokchung nung sentong tulu ayongzükba akaba nung talisa saisapong sentong nung Match Patron aser tongti shilem nung aiben osang zülurtem mamshir, saka tanü iba sentong nung osang zülurtem nem

maongka agütsüba ajanga nüburtemi media angatetba sayur ta tepelaba metetdakja ashi.

Quarter Final-i itetba team ajak nem tenüngsang agüja ashiba den team ajaki takok tashi tajungtiba nung asayaa takok angutsü merangang ta Mokochung Press Club President-isa asayartem ayongzükba ashi.

Mezüngbuba Quarter Final nung Etovi Memorial Club, Dimapur aser Eastern Tornado,Tuensang tsüngda asayaba nung Etovi Memorial Club, Dimapur-i 25-23,25-16 agi koka semi final nung asayatsü , tanabuba Quarter Final asaya Ozümi

aser Longsa Sporting Club, Mokokchung tsüngda asayaba nung 27-25 ta nguteta mezüngbuba set Longsa-i akok, saka tanabuba aser tasembuba set nung 25-22 aser 25-11 ta nguteta Ozümi-i iba tanabuba quarter final asaya koka semi final nung asayatsü maongka ajangzüketetogo.

Iba osang zülü tashi nung Tasembuba aser Pezübuba quarter final asaya metenzüki liasü.

September 19 aonung tashi nung quarter final asaya tembangtsü aser September 20 nung semi final ana aser Final-ta asaya iba tournament September 20 nü tembangtsü asoshi sentong renema lir.

Paralympic Bronze medalist Hokato Dimapur tongogo



Dimapur, Rongjui/ September 19 (TYO): Nagaland nungi mezüngbuba Paralympic Bronze medalist Hokato Hotozhe Sema September 19 nü Dimapur airport nung agizükogo. Pa ya Niuland kübok P. Vihoto yimtsüng nungi lir.

Brehostibarnü Western Sumi Hoho aser Frontal organization, lokti tentet balala, NGO, CNTC aser tribal Hoho balala, kaketshir lokti tentet balala aser wadang balala nungi nüburtemi Dimapur airport nung Hokato Hotozhe Sema pelashishia agizükba liasü.

Ariport tonga aruba sülen pa pelashishia agizükogo aser pai bendanga agüja asayaba ajanga

international jenjang nung Nagaland tenüng ajungkettsüba benjunga liasü. Pai 2024 Paris Paralympics Games nung tebur F57 shotput event nung bronze medal ka ngua liasü.

Ariport nung o tatsüka jembiba mapang Hokato Hotozhe Sema-i pa kanga meraketa agizükba atema aser temeim sayua pa nem aküm tetushi agütsüba asoshi kanga pelaba lemsatepa liasü.

Paisa, Paris Paralympics Games nung pai takok anguba indang lemsatepba mapang ashiba agi, pa nükjidongji tanga NE state tem shirnoki medal aika nguogo parnok ama Nagaland asoshi medal ka koktsütsü liasü.

Hokato-i ashiba agi, Paris Paralympic asayatsü hopta ka lia pa yiru aser yimra agi tonger kangshia liasü, saka Nagaland atema medal ka koktsütsü asoshi temlungtetba tulu aliba ajanga pa tejakdangi ani aser Tsüngrem taochi aser nüburtemi pa kanga nongita yariba ajanga medal ka ngutetogo.

Paisa, pa Nagalnd tenüng nung kanga nemadanga shilem agiogo aser international asayamung ka nung bronze medal ngua otsü tasen ka yangluogo, ta ashi. Maneni pai pa nongita yariba aser sarasadem nung bilemtetba atema Nagaland nung aliba nüburtem dang kanga pelaba lemsatepa liasü.

NSF Trophy: Asufü, Pehlum & Delai nunger 3buba round-i iogo

Kohima, Rongjui/September 19 (TYO): NSF Martyrs' Memorial Trophy nung Brehostibarnü Asufü Christian Institute, Pehlum Lamhil Lawn Academy aser Delai Football Club nungeri pei tata asaya koka tasembuba round tongtetogo. Iba asayamung ya Angami Students' Union-i ayongzükba Indira Gandhi Stadium Kohima nung tang tasayadak lir.

Brehostibarnü mezüngbuba asaya Asufü Christian Institute-i goal 2-0 agi Sahei FC koka liasü.

Asaya nung Ngararsingh Raikhan-i minute 6buba nung mezüngbuba goal idaktsü aser iba sülen Elozüo Kayina-i minute 36buba nung tanabuba goal idakja liasü.

Iba asaya atema Asufii Christian Institute nungi Dhanaraj Singh nem man of the match naroküm agütsü.

Tanabuba asaya nung Pehlum Lamhil Lawn Academy-i goal 7-1 agi Onyx Titans FC kokogo.

Asaya nung Ginminthang Haokip-i minute 45, 59 aser 64buba nung goal asem idakja hat-trick ka agütsü aser Lunminlal-ia minute 9buba aser 62buba nung goal ana idakja liasü. Maneni Honminlun Haokip-

i minute 38buba nung aser Haothensei-i minute 66buba nung goal kaka idakja liasü.

Onyx Titans atema goal ka ya Yekuto-i minute 68buba nung idakja liasü. Iba asaya atema Ginminthang Haokip nem man of the match naroküm agüja liasü.

Brehostibarnü tatembangbuba asaya nung Delai FC-i goal 15-0 agi Khrietho FC koka liasü.

Asaya nung mezüngbuba goal ya Thonggoumang-i minute 3buba nung idaktsü aser paisa, minute 13, 16, 27 aser 65buba nung goal pezü idakja ajak senteper goal pongu idaktsü.

Haonunreng-ia minute 4, 28 aser 63buba nung goal asem idakja hat-trick ka agütsü aser Seiginhao (35 & 42 minute) o Thanglenlal (57 & 61 minutes) natia goal anana idakja liasü. Maneni Delai FC atema Lamminhao aser Mangminlun natia goal kaka idaktsü aser Keneisekho Yashü-i own goal ka idakja liasü.

September 20 nü asaya:

1. Youngsters FC vs Jakhama Y.O. @ 9:30am
2. Sechü Zubza FC vs Magdaline C.C. @ 11:30am
3. F4C Academy vs Kigwema Students' Union @ 1:30PM.

BENDANGLI OSANG : Tapak 7 nungi...

Israel-i rara shilem tasenba sangdong...

Pai Mongulbar aser Bodhbarnü electronic oset apokba indang mesüok saka Israel army aser security agency indang mapa tenüng sanga, "Result nung temlung kanga asür," ta shia liasü.

Bodhbarnü Lebanon tesem balala nung apokba osang sorkar meyong National News Agency ajanga ashi aser Beirut eastern aser southern tsütsü Hezbollah tashi ita alidak pagers aser "devices" tem apok aser anüdoklen Bekaa region nunga nisung asem yiru ta ashi.

Hezbollah indang al-Manar TV-ia tesem balala nung apokba indang ashi aser itemji walkie-talkies apokba ajanga lir ta shia liasü.

Mongulbarnü pagers apokba ajanga asüba Hezbollah züngsem asem aser tanur atema Beirut nung asüpila sentong Bodhbarnü agidang ola tulu adoka apokba angashi, ta osangbener temi ashi.

Mongulbarnü Lebanon tesem balala nung pagers apokba ajanga tanur ana densema nisung 12 shi takum samatsür ano nisung 2,800 shi yirutsür lia Bodhbarnü iba lendong atalok. Mongulbarnü lendong atema Hezbollah aser Lebanon sorkari Israel tenüng sena liasü.

Israel-i tang tashi iba

tatalokba atema osang kecha sangdonga mali.

Iba lendong yagi civilian tem mulungjang kanga sashia anokshitsü, kechiaser Hezbollah tashi ita aliba Beirut nung mozüki tem sünga nüburtem azü agi yimbanger adenshia liasü.

Lebanon den arütsü anasa aliba pei kidangi meyipa shilanger adentsü asoshi rara nükjidong ulushir ta Israel-i sangdongba sülen Mongulbarnü aser Bodhbarnü iba lendong ya ataloka liasü.

Hamas teloki October 7 nü southern Israel amakba mapang nisung 1,200 shi tepseta ano nisung 250 shi pua bener aoba sülen Gaza nung rara tenzüker nisung meyririjang aika northern Israel yutsür ogo.

Iba sülen Israel-i Gaza Strip makyonga arudang nisung 41,000 dak tema tepsetogo aser Palestine territory tuluba aoyi kumtsü.

October 8 nungi Hezbollah teloki anogoshi ama Lebanon-Israel arütsülen Hamas bhukuma Israel sepaitem den khatapa arur.

Mapa tamajung inyakba ya Israel mapa lir ta Hezbollah-i Bodhbarnü ashi aser tang tesüsa amakba mang ayangtsü aser Gaza nung Hamas bhukuma Israel den maneni raratsü ta sangdonga liasü.

BILEMDANGANG
 "Alima ya nü tatishitsü agi melenshitsü akok."